

李文忠公奏稿

李文忠公奏稿

卷之七十四目錄

熱河都守請滿漢兼用摺

光緒十八年二月初九日

柴湖建淮軍昭忠祠摺

光緒十八年二月初九日

再請優卹吳毓芬片

光緒十八年二月初九日

各省捐辦直賑請獎摺

光緒十八年二月二十五日

京滬電報請獎摺

光緒十八年二月二十五日

奏理賀壽恩片

光緒十八年二月二十五日

熱河教匪肅清彙獎摺

光緒十八年三月十一日

奏保張士珩片

光緒十八年三月十一日

奏保余昌宇片

光緒十八年三月十一日

宣化練軍會剿教匪請獎摺

光緒十八年三月三十日

徐道奎請卹片

光緒十八年三月三十日

武備學堂請獎摺

光緒十八年四月二十七日

籌辦熱河電綫片

光緒十八年四月二十七日

請緩鹽課奏銷摺

光緒十八年四月二十七日

守護 醇賢親王園寢摺

光緒十八年五月二十四日

盛宣懷調津關摺

光緒十八年五月二十四日

查覆馬玉崑保案片

光緒十八年五月二十四日

海軍經費報銷摺

光緒十八年五月二十五日

賑撫收支彙報摺

光緒十八年六月十三日

覆陳熱河勘賊加餉片

光緒十八年六月十三日

劉瑞芬請付史館摺

光緒十八年六月十三日

辦理朝鮮商務請獎摺

光緒十八年閏六月初八日

奏保袁世凱片

光緒十八年閏六月初八日

請推廣賑捐摺

光緒十八年閏六月二十日

酌定旅順船塢

新費片

光緒十八年閏六月二十日

請給俄員寶星片

光緒十八年閏六月二十日

李文忠公奏稿卷七十四

全集一之七十四

桐城吳汝綸編錄

熱河都守請滿漢兼用摺

光緒十八年二月初九日

奏爲熱河邊防重要請將口外旗缺都司守備援案改爲滿漢兼用以裨營伍恭摺仰祈

聖鑒事竊查提標八溝營參將所屬之建昌營赤峯營各都司朝陽營守備遇有缺出例應於滿員內揀選題請升調查建昌切近喜峯口一帶赤峯則壤接固場朝陽則界連奉省實爲熱河保障畿北屏藩各該營所轄汛地均迴環二千餘里山徑錯雜馬賊出沒靡常糾盜衛民責成極重兼以近年蒙漢民教結怨尋仇致上年冬閒釀成巨亂數萬生靈均遭荼毒苟非官軍赴機迅速必致滋蔓難圖兵燹以後尤賴將備會同牧令認真巡防撫輯冀可弭

忠未形非精明幹練勤於緝捕之員不克勝任現在口內旗缺都司守備多係部推人員或初任尙少閱歷或邊防未經習練若仍拘守成例循資遷轉控制稍不得力貽誤實非淺鮮夫地方情形今昔既異立法須因時變通卽如口外州縣向係專用旗員嗣因蒙民雜處獄訟繁多改爲滿漢兼用俾資治理仰見

朝廷用人不拘成格文武事同一律自應斟酌時宜以善其後臣前因多倫諾爾孤懸塞外盜賊滋紛請將該協中左右三營都司守備改爲滿漢兼用經部覆准在案熱河大難甫平人心未定伏莽猶多舉凡彈壓浮囂緝拏賊匪修明武備警飭軍規均爲目前急務邊防之重實較多倫諾爾爲尤甚懲前毖後未便稍涉因循所有建昌赤峯朝陽三營都司守備員缺應請援照多倫成案改爲滿漢兼用嗣後遇有缺出在於通省現任都司守備千總內揀

選諳練戎機講求捕務之員分別請調請陞如一時不得其人卽以在直年久熟悉邊情之候補人員請補以收人地相宜之效臣與提督臣籌商至再意見相同此亦熱河善後應辦之一端仰懇天恩在照所請辦理實於口外時局大有裨益理合會同直隸提督臣葉志超合詞恭摺具陳伏乞

皇上聖鑒訓示謹

奏

巢湖建淮軍昭忠祠摺

光緒十八年二月初九日

奏爲皖省廬州巢湖捐建淮軍昭忠祠請列入祀典恭摺仰祈
聖鑒事據統領武毅等軍直隸提督葉志超等聯名呈稱淮軍剿
辦粵捻以來大小數百戰立功死綏諸將士疊荷

恩褒迨巨寇削平各軍調辦海防修築臺壘勤苦工操遇有積勞
亡故人員咸蒙奏卹凡在戎行同深感奮伏查江蘇之蘇州無錫
湖北之武昌直隸之保定皆係淮勇立功地方疊經奏奉

敕建淮軍昭忠祠專祀剿平粵捻陣亡傷故文武員弁勇丁及海
防積勞病故人員各在案廬州爲淮軍創始之地祠祀至今缺然
署甯夏鎮總兵衛汝貴去歲治喪回里與在籍江蘇候補道李天
鉞及各紳士詳議擬援湖南湘鄉縣及洞庭君山湘軍昭忠祠故
事在廬州府城東南之巢湖中廟空隙處所創建淮軍昭忠祠所

需工款各軍自行捐助請奏明立案列入祀典由地方官春秋致祭等情臣維咸豐初年粵逆竄擾皖北捻匪復芽蘖其間廬州爲爭戰要衝羣寇環伺其時臣父刑部郎中記名御史李文安暨臣先後奉

旨回籍辦理團防因督同在籍紳團故兩廣總督張樹聲前福建臺灣巡撫劉銘傳故湖南提督周盛波故廣西巡撫潘鼎新等部分子弟招致豪傑各練鄉勇屢殲巨寇保衛里閭以忠義相提倡爲粵賊所畏懼同治元年臣奉

命督師東下忝任蘇撫創立淮軍諸人並奉所部以從今四川總督劉秉璋故廣東水師提督吳長慶等亦以旁縣之士各成一軍隨同進剿其後戡定全吳肅清二捻戰伐之迹徧於浙閩江皖鄂豫直東各省將士盡瘁效忠後先相率臣家

恩旨卹贈有加賡賞逮於子孫崇祠徧於南北

褒忠之典曠代罕傳昔大學士曾國藩於咸豐八年奏建湘鄉縣昭忠祠謂上以體

聖世褒忠之意下以勵鄉人觀感之誠遯逆旣平曾國藩復爲祠祀歷序軍事本末而推原於人心忠誠之激發蹈死亡而不悔臨艱險而不避故能芟夷大難歷久而不變也淮軍之起逾三十年同時其事之人存者十不一二而部曲將校遞統其眾皆昔時百戰相隨之士並能修明紀律不墜軍聲迄今拱衛

畿嵬東至營青南迄閩廣屹爲海防得力之師其留防江鄂各軍雖經汰裁猶稱勁旅歷時雖久士氣不衰廬州爲各將士故鄉親見從前治軍締造之功捍衛之績其後父兄子弟從征四方長往不返歲時霜露良足感傷各省皆有祠祀而本郡獨無懼無以稱

朝廷褒卹忠勤之至意該提督等擬仿湘鄉縣及洞庭湘軍昭忠祠成案於廬州巢湖之中廟隙地捐建淮軍昭忠祠用申報饗庶以妥伯毅魄昭示來茲合無籲懇

恩施俯准一體列入祀典由地方官春秋致祭以昭激勸如蒙俞允再由臣咨會安徽撫臣知照理合繕摺具

奏伏乞

皇上聖鑒訓示謹

奏

再請優卹吳毓芬片

光緒十八年二月初九日

再已故統領華軍江蘇題補道吳毓芬在籍病故前據淮軍各將領呈請奏卹上年八月開曾經臚陳事蹟懇乞

恩施欽奉

硃批吳毓芬於何時離營回籍何時病故著李鴻章查明覆奏再行降旨欽此當卽欽遵轉行知照茲據查覆前來臣維吳毓芬自同治元年隨臣率師東下總理營務治兵籌餉草創經營論淮軍締造之功實居同時將吏之首旋募立華字營勦辦粵捻轉戰南北各省大小百數十戰無役不從六年東捻肅清十二月因前在軍營積受寒溼驟患風痺請假回籍遂成偏廢延至光緒十七年三月病故伏查軍營立功後積勞病故例准議卹自應以前在軍營曾否立功其後病故是否積勞爲斷軍事平後各營裁撤昔年

賊將大半解兵其歿於田開荷蒙

哀卹者不可勝數

聖朝追念既往激勵將來原未嘗因已離營遂沒其從前勤勩也近如記名布政使席寶田於同治十年離營回籍光緒十五年在籍病故經升任湖南撫臣王文韶奏請

賜卹仰荷

恩准在案席寶田回籍垂二十年與吳毓芬離營年分相等吳毓芬本淮部得力統將所帶華字六營當剿賊時寶與銘鼎慶樹各軍聲績相埒蕩平東捻一役生擒首逆賴汶沈尤推首功其後張樹聲等各積官闕洊至封圻而吳毓芬獨以疾歸名位未顯然淮軍諸將羣相推服至今稱道弗衰前後疆臣如曾國藩李宗羲丁日昌等重其才望並欲因事起之終以抱病不出未竟其用追念

前勞實難泯沒該故道職功事蹟臣前奏業已詳細上陳合無籲懇

天恩俯准仍照軍營立功後積勞病故例從優議卹並附祀各省

淮軍昭忠祠以彰勳績出自逾格

懇施理合附片

奏

聖鑒訓示謹

各省捐辦直賑請獎摺

光緒十八年二月二十五日

奏為查明各省籌辦順直賑捐出力之將軍督撫司道各員懇懇天恩照案獎敘恭摺仰祈

聖鑒事竊查光緒十六年夏間順直地方淫雨為災各河漫溢被災州縣至六七十處之多工賑並興用繁款絀經臣奏准開辦賑捐一面電函馳告各省廣為勸募藉資集腋業於十六年十二月開初次奏報捐數摺內請將勸捐出力之奉天將軍臣裕祿等交部從優議敘奉

旨允准在案茲查吉林將軍臣長順兩江總督臣劉坤一閩浙總

督臣卞寶第河南巡撫臣裕寬新疆巡撫臣陶模山東巡撫臣福

潤廣西巡撫臣張聯桂前護理新疆巡撫臣魏光燾廣東藩司成

允陝西藩司張岳年安徽藩司阿克達春江西藩司方汝翼雲南

藩司史念祖河南藩司廖壽豐湖南藩司何樞福建藩司潘駿文
督四川藩司德壽署甘肅藩司裕祥署新疆藩司饒應祺湖北臬
司陳寶箴兩淮鹽運使江人鏡前署湖北臬司惲祖翼江蘇蘇松
太道聶緝綦山西翼州道俞廉三湖北鹽法道瞿廷韶署湖北糧
道恭釗直隸候補道沈能虎江蘇候補道沈玉麒安徽候補道任
錫汾等自聞順直被災卽經竭力勸籌飭委員分投募集源源
解濟所收捐款已於上年七月十一十二月兩次奏報竊念此次
順直水災之重爲數十年所未有直隸向稱缺額賑款無措全賴
他省捐輸踴躍以濟維拊之窮在各疆臣等慷慨恤鄰力顧大局
固出自公忠體
國之忱而當災黎待命之時深感遠道協助之誼現在賑務告蒞
自應據實臚陳仰懇

天恩俯准將該將軍督撫及司道各員一併
敕部從優議敘以昭獎勵理合恭摺具陳伏乞
皇上聖鑒訓示謹

奏

京滬電報請獎摺

光緒十八年二月二十五日

奏爲歷年辦理京城天津上海等處電報委員人等異常出力援案酌請獎勵懇

天恩俯准照擬給獎繕單恭摺仰祈

聖鑒事竊中國電報經臣奏明自光緒六年創始先從天津上海設局開辦逐漸推廣十年將通州電局移設京城聯爲一氣自是沿江沿海邊遠各省次第接設電綫縣互至一萬數千里中外一切要政朝發夕至消息靈通而事務之繁責成之重則以京城天津上海爲轉遞各省及東西洋各國之樞紐凡有總理衙門傳奉諭旨以及各省督撫出使大臣來往官報無不由此三處傳達當光緒八九十年法越起衅沿海戒嚴朝鮮兩次內亂派兵援護將帥軍謀

朝廷密諭在在胥關緊要不容絲毫延誤上年南省會匪蠢動私
運軍火事機危險幸有電報立時遞達先期查獲消患未萌去冬
朝陽教匪倡亂事起倉猝軍情急迫奉直兩省徵調防營及臣指
示各將士勦辦機宜均賴電報迅速相機立應早奏膚功中國向
來用兵未有如此次之神速者該委員司事學生等在局常差多
或十餘年少亦六七年晝夜輪守接報寢饋弗遑終歲無休息之
日重大事件隨到隨發格外慎速從無洩漏遲擱之弊每遇狂風
大雨河決隄沖綫桿倒塌立刻馳往冒險修護勞苦艱鉅迥非尋
常局務可比且電局定章極嚴員司人等稍涉貽誤立予懲處絕
不寬假若有罰而無賞似不足以鼓舞人心收罕策羣力之效查
天津上海兩處設立文報局接遞外洋文報每屆三年期滿在局
人員非照異常勞績給獎雲貴閩廣各省設立電報均奏奉

諭旨准照異常勞績給獎各在案今京城天津上海各局接遞中
外要電有關軍國大計事極繁重核其勞績較文報局實過之亦
較滇粵邊省關係尤要該承辦員司等歷時至十餘年之久勤苦
更爲倍著自應從優甄敘以資鼓勵據督辦電報局務山東登萊
青道盛宣懷開單詳請核奏前來臣覆加刪減擇其尤爲出力者
酌照異常勞績請獎凡出力稍次之員仍照尋常勞績核擬俾示
區別此外官商各局事務較簡均未敢概行聲請謹彙繕清單恭

呈

御覽仰懇

天恩俯准照擬給獎出自

慈施特沛除飭取各員履歷咨部外理合恭摺具陳伏乞

皇上聖鑒訓示謹

奏

奏理賀壽慈片

光緒十八年二月二十五日

再據順直紳士御史孟繼堉編修金壽及在京在籍官紳並舉貢生監等四百五十人聯名呈稱已故降調工部尚書原任都察院左副都御史賀壽慈於同治六年督學順直屏絕陋規甄拔積學嚴防槍遞宿弊一清七年正月按試定州正值西捻張總愚全股北犯偵定州空虛欲據爲巢穴藉以東窺保定北擾易州居民一夕數驚紛紛竄避時有勅回駐省城者該故尚書謂使車所至義其存亡況定州扼南北之衝保定涿易各城恃爲屏蔽無定州是無保定也遂招致紳富捐資募勇嚴禁逃徙部署山定而賊大至見城上軍容壯甚疑有重兵遂巡未敢銳攻援師既集解圍南窺足役也以十餘萬之悍賊窺危弱之孤城微該故尚書誓死堅守非特一州塗毒近畿東北一帶將不可問事定歸功將吏口不

言勞尤爲人所難及去官後因其長子已故貴州按察使賀良楨
在長蘆鹽運使任內迎養來津遂寄寓郡城遠近人士執經請業
者甚多該故尙書年逾八旬猶訓迪不倦光緒十七年十一月開
病歿伏查該故尙書降調處分本係因人獲咎溯其戡成多士力
保危城之功德未忍聽其湮沒不彰謹合詞籲請奏乞

恩施優加褒卹等情

臣查降調工部尙書賀壽慈早歲通籍渥荷

先朝知遇洵屬臺省垂四十年在順天學政任內卓著聲績力守
定州尤爲大局所繫至今人士稱念弗衰晚歲就養其子升任長
蘆運司賀良楨官舍後遂寄寓天津閉戶著書時與及門弟子講
習經義毫毫不倦而於地方官吏從無往還臣本與備識在津數
年未嘗干謁守道自重心竊敬之其降調因書賈李鍾銘被參案
內察連權議業經刑部都察院訊明李鍾銘並無干預公事情弊

質壽慈惟以承辦要務不應順道翻閱書本是其獲咎甚輕茲於身歿之後順直官紳感其舊日勤勞合詞籲懇奏乞

恩施具見輿情愛戴未敢壅於

上聞惟係降調一品大員應如何

量予恩施之處

朝廷自有權衡非臣所敢擅擬理合附片據情具陳伏乞

聖鑒訓示謹

奏

熱河教匪肅清獎摺

光緒十八年三月十一日

奏為直隸派出淮練馬步各營剿滅熱河教匪肅清全境查明在
事出力文武員弁暨後路轉運餉械各員分別酌擬獎敘彙繕清
單懇

天恩俯准照擬給獎以資鼓勵恭摺仰祈

聖鑒事竊照上年十月間熱河朝陽地方教匪倡亂經臣調派淮
練馬步各軍分路進剿並令提臣葉志超親往督辦所有剿賊獲
勝將弁業經該提督在熱河行營隨摺奏保並聲明其餘在事出
力將弁及後路轉運餉械文武各員俟肅清後由臣查明彙案請
獎等因在案茲准提臣葉志超將在事出力人員詳細開單咨請
核奏前來臣查熱河教匪以仇殺天主教蒙古為名揭竿起事焚
署劫獄戕官踞地殘害藩部屠毒生靈其勢甚為猖獗臣於聞警

之初先派副將夏青雲總兵劉運昌葉玉標楊元昇等選帶馬步
練軍分出石門喜峯口馳往兜擊適值提臣巡閱古北口卽奏派
就近督隊前往並檄飭宣化鎮總兵王可陞酌調練軍馬隊赴多
倫赤峯一帶相機防堵杜賊內竄之路嗣因賊勢浩大兵力單薄
續派總兵潘鶴才馬隊兩營提督聶士成步隊四營合力會剿並
飭通永鎮總兵吳育仁挑帶北塘防營總兵曾騰芳酌帶練軍中
營由喜峯口湯道河進駐平泉建昌扼紮堵截又以熱河爲
圍庭重地防護未可稍疏復派總兵鄭崇義帶直字兩營副將任
永清帶親軍馬隊徑赴熱河保衛雕勦並派副將呂本元率盛軍
飛騎馬隊五營馳赴前敵聽候調遣以厚兵力幸賴
皇上天威將士用命自五官營大捷後疊將榆樹林葉伯壽毛家
窩鋪等處巨股擊散遂進攻下長皋踞賊克復貝子府老巢並分

派馬步隊剿滅翁牛特烏丹城股匪先後大小數十仗無戰不勝甫逾市月竟將首犯次第殄擒各股逆匪一律蕩平向來用兵未有如此之神速者其詳細戰狀業經葉志超疊次臚陳早邀聖明洞鑒伏念此次教匪謀亂事起倉猝旬日之間各股響應聚眾數萬人擾害四州縣並敢僭稱偽號盤踞巢穴迥非尋常土匪聚眾滋事可比口外地勢遼闊山徑叢雜本係馬賊出沒教黨腐集之區若不及早撲滅勢必裹脅日多蔓延日廣不獨熱河全境受其蹂躪且恐竄擾內地震驚

畿輔釀成巨患淮練各軍分駐海防相距口外千餘里山路崎嶇各營奉調後不憚險阻立刻拔隊晝夜疾驅數日內均各先後趕到無誤事機時值隆冬嚴寒塞外風霜凜冽墮指裂膚各將士於冰天雪地之中窮谷深山之內忍飢耐寒馳驅轉戰艱苦備嘗當

夫陷銳攻堅鎗礮雨集無不捨死忘生冒險取勝下長皋貝子府
烏丹城等處之戰賊勢最悍殺賊最多積屍遍野現飭辦理善後
委員候補知府葉御璜前往接仗各處搜查據報掩埋骸骨共約
二萬餘具則當日鏖戰之猛斬馘之眾可爲明證該將弁等躬冒
鋒鏑異常奮勇前者傷亡後者繼進用能迅殲醜類速奏膚功茲
當軍務肅清論功行賞自應從優獎勵以期鼓舞軍心至後路留
防各營兜捕逸匪保衛地方轉運軍火糧餉各員冒險遠征力籌
接濟俾前敵諸將得以專心攻剿迅赴戎機亦不無勞勩足錄單
開各員臣已嚴加刪汰擇其戰功卓著尤爲出力者按照軍功章
程從優獎敘其出力較次之員仍酌照尋常勞績核擬以示區別
應給千把等項照章咨部註冊謹彙案繕單恭呈

御覽仰懇

天恩俯念該將士等效命驅場勞苦功高非其照擬給獎出自逾格

懇施除飭取各員履歷分咨外理合恭摺由驛具

奏伏乞

皇上聖鑒訓示再宣化練軍出力人員應俟該總兵王可陞查明開報到日再行續請獎敘合併陳明謹

奏

奏保張士珩片

光緒十八年三月十一日

再總辦北洋軍械局花翎二品銜分省補用道張士珩安徽舉人
由軍功勞績洵保今職在北洋當差有年留心時務於西洋各國
新式鎗礮子藥器械均能認真考究辨別良楛海防水陸各營及
內地分防練軍需用外洋新式軍械均由該局籌撥綜覈精詳有
條不紊上年冬閒熱河教匪作亂調派淮練各營同時出口事機
緊急需用軍裝刻不容緩該員晝夜趕辦力任其難凡軍中一切
利器及緊要物件無不妥速籌備立刻應付各軍雖倉猝成行而
器械精良軍火充足得以迅赴戎機不至遲延貽誤關係軍情大
局殊非淺鮮又復督率員弁兼程冒險轉運源源解濟俾前敵各
營逐日轉戰無虞缺乏故能迅殲巨寇早奏膚功現准提臣葉志
超以熱河賊匪皆係亡命獍悍若非鎗礮快利子藥應手斷不能

以少擊眾剋日勦滅而籌慮周詳解運神速實賴該員一人之力
核其勞績與前敵立功諸將無異合請破格優獎等情前來臣查
該道張士珩經濟閎通才猷遠大軍事史事懋練頗深實爲文武
兼資之選堪備

朝廷任使此次辦理熱河軍務功績尤著若僅加級加銜似不足
以示鼓勵且其銜已無可再加應如何

簡擢之處出自

特恩非臣所敢擅擬謹附片陳請伏乞

聖鑒謹

奏

奏保余昌宇片

光緒十八年三月十一日

再熱河軍務肅清所有出力文武各員業經彙案另摺奏請獎敘
茲查總辦北洋電報官局花翎二品頂戴直隸候補道余昌宇自
光緒七年委令創辦津滬電綫旋又勘設蘇浙閩粵及廣西電綫
值法越構兵由工次兼理關外往來緊急軍報又奏派接辦朝鮮
及東三省電綫大工輾轉六載縱橫二萬里始終其事艱苦備嘗
十二年委令總理北洋電局奉直沿海地方如錦州山海關蘆臺
北塘等處設立分局皆歸該員督率經理所收報資坐支各局經費
歲修工料外逐年積有盈餘節省官帑不下十餘萬兩辦事極
爲認真上年冬閒熱河教匪倡亂事起倉猝幸錦州電局首先報
信得以立時派兵援剿嗣後徵調各處防軍偵探賊匪蹤跡並
指授前敵將士機宜均賴電報神速相機立應當軍情緊急之時

該員嚴督各局司事學生晝夜輪守接遞不辭勞瘁提督葉志超奏報肅清摺內亦以電報消息靈通始能剋期滅賊今值大功告成凡屬在事人員均邀甄敘該員余昌宇才具明練講求吏治辦理電務資勞甚深伏念電報爲

國家創辦之舉有關軍國大計承辦必須得人始收實效余昌宇講求有素實心整頓卽刺陽一役已得其助自應優予獎擢查上年籌辦賑務出力之道員黃建筦朱其詔等經臣奏請送部引

見奉

旨允准有案可否仰懇

天恩俯准將余昌宇送部引

見聽候

諭旨錄用之處出自逾格

恩施謹附片具陳伏乞

聖鑒訓示謹

奏

宣化練軍會勘教匪請獎摺

光緒十八年三月三十日

奏為查明宣化練軍會勘熱河教匪出力各員分別酌請獎敘繕具清單恭摺仰祈

聖鑒事竊查直隸派出淮練各營去冬勘辦熱河教匪肅清全境業將出力文武將弁彙案奏獎聲明宣化練軍各員俟開報到日再行請獎在案茲據宣化鎮總兵王可陞查明出力人員開單呈請核奏前來查上年熱河教匪倡亂各股響應勢甚猖獗臣恐賊匪分竄西北蔓延內地飛飭宣化鎮總兵王可陞迅帶練軍馳赴多倫赤峯一帶相機防剿該鎮奉調後即親督馬隊由多倫繞赴蒙古放漢巴林各部落擇要扼紮並派營多倫協副將徐平川副將徐萬隆練軍副長提督楊正清由經棚白岔拔隊前往分投堵截旋據赤峯縣營飛報該處股匪蠢起佔據村鎮縣境被圍緊急

該軍折回赴援於十一月十五日行至縣屬七顆樹川地方突遇
大股匪首李懶珍率悍黨數千直撲合成公燒鍋店徐平川等四
面奮擊疊獲大勝擒斬悍賊甚眾餘匪敗回南路遂爲銘軍潘萬
才悉數殄滅自是赤峯圍解賊始不敢北犯繼又派撥馬隊裹帶
行糧分赴克什克騰巴林翁牛特三旗地面覘賊所向游弋兜擊
各股鼠匪搜捕殆盡西北兩路各王旗游牧均賴以保全不致被
賊擾害其大概情形前經葉志超奏明有案伏念該軍自出口會
期以來馳驅轉戰艱苦備嘗卒能掃蕩賊氛保衛濟服遮蔽畿疆
實屬異常奮勇其沿邊張理獨石多倫三廳文武營汛籌辦團防
轉運餉械亦有微勞足錄茲當大功告成各營從征將士均邀甄
敘該軍出力人員自應一體優獎謹分別酌擬獎敘彙繕清單恭
呈

御覽仰懇

天恩俯准照擬給獎以示鼓勵記名提督直化鎮總兵王可陞督
率有方勤勞懋著並請

敕部從優議敘出自

恩施除應獎千把等項照章咨部註冊並飭取各員履歷分送外
理合恭摺具

奏伏乞

皇上聖鑒訓示謹

奏

徐道奎請卹片

光緒十八年三月三十日

再已故記名提督大名鎮總兵徐道奎於本年正月十二日因病
出缺當經馳奏并聲明該故鎮戰功勞績俟行查詳確再行上陳
在案茲據統領武毅軍直隸提督葉志超等屬具事實聯名呈請
奏卹前來臣查徐道奎於咸豐年間以義勇從軍歷隨故提督傅
振邦曾秉忠江南軍營克復溧陽縣城防剿松滬一帶屢挫賊鋒
臣於同治元年督師赴滬委帶親兵水師營隨同進剿二年攻克
福山石城解常熟昭文縣圍旋調援浙力戰新塢張涇匯等處克
復平湖縣城斬賊目陶雲從胡金鏞降賊目陳殿選等乘勝連克
海鹽乍浦二城三年殲破新豐鎮吳涇橋賊壘進佔嘉興拔賊先
登噴筒傷石目裏利狻進諸軍繼之遂復府城時湖州踞賊以屍
舍爲門戶集悍黨死守該故鎮以師船力戰二十餘日擊散守賊

率眾登陸由昇山八里橋追殺直薄湖州府城奪門首入身受刀
矛數傷五年調勦擒匪率師船由清江浦一帶與大股悍黨接仗
屢勝進紮濟甯扼防運河賊由戴廟竄撲濰縣膠萊等處該故鎮
抽撥礮勇由陸堵勦復以舟師截擊於南陽湖袁家口賊不得逞
東捻以平七年西捻驟至復調渡黃北援時張秋河淤道梗該故
鎮督勇星夜疏濬兩月工竣遂以所部分扼東昌臨清德州故城
一帶運河縣互數百里賊屢從高家店漫口桑園第二屯老君堂
等處盡力衝撲圍竄直境該故鎮疊水堵擊堅守多日賊終不能
搶渡遂燬之徒駭河全股肅清前後積功燬寨

恩獎以無論水陸提督總兵缺出開列在前

賞穿黃馬鞋

賞給正一品封典協勇巴圖魯名號八年調鄂九年調陝旋調直

隸辦理海防創修水師營壘工程十一年

簡放大名鎮總兵光緒五年到任大名界連東晉豫三省向爲盜賊出沒之區該故鎮先後擒治著名大盜一百餘名暨河南鉅案要犯劉得浚范二等劫案漸稀黃河北徙後東明爲大溜要衝近年下游淤墊險工疊出該故鎮以汛兵積習太重修防多不可恃分撥練勇一營專駐河干平時令作工程遇險親督搶辦又建議添築下汛月隄戢隄以禦激湍十餘年來東境無歲不患河十三年上游復決於鄭州而大名居其中隄障屹然非該故鎮之力不及此疊次安瀾案內並蒙

褒敘有加漳河歲久失修盛漲輒壞城垣漂沒田舍該故鎮疏鑿白水灘舊河濬深城濠及城東之三里河引漳水入衛河就土培隄近城可免水患工作悉資兵力不費公家一錢身歿之日家無

餘財其廉公尤爲一時所推服臣伏念徐道奎早歲從戎身經百戰屢當大敵疊克名城曾受重傷力任危險忠勇血性始終如一在大名十三年捕盜治河尤著名績年雖七十精力未衰遽以微疾觸發舊傷奄忽致阻宿將漸稀深爲痛惜溯其居官之績戰陣之功卓然可傳不容泯沒合無籲懇

天恩俯准將已故記名提督大名鎮總兵徐道奎照軍營立功後積勞病故例從優議卹將事蹟

宣付國史館列傳並附祀各省淮軍昭忠祠以彰蓋績出自逾格懇施埋合附片陳請伏乞

聖鑒訓示謹

奏

武備學堂請獎摺

光緒十八年四月二十七日

奏爲天津武備學堂又屆兩年期滿請將在事出力員弁及屢考優等學生照章擇尤給獎繕單恭摺仰祈

聖鑒事竊臣於光緒十一年正月在天津創設陸軍武備學堂挑選各營精健聰穎略通文義弁兵入堂學習西洋兵法奏准將教習繙譯各員及屢考優等學生按照總理衙門同文館成案二年奏保一次以示鼓勵嗣於十三十五年兩屆期滿經臣將在事出力各員奏請獎敘均奉

硃批著照所請該部知道等因欽此欽遵在案茲自十五年十月起扣至十七年十月止又屆兩年期滿查該教習繙譯等自上次保獎後辦事益加勤奮兩年以來會督德國教習兵官朝夕課導始終不懈在堂弁兵學生於天文地輿格致測繪算化諸學臺礮

營壘新法行軍接仗設伏防守機宜認真講求洞悉竅要並逐日操練馬步礮隊各技藝疊經派員月試季考並由臣親加考驗均能融會貫通一律嫻熟當將屢考優等學生飭回各營轉相傳授仍令月選新生入堂分番迭進以期日起有功近來風氣漸開成就較廣提臣葉志超亦於山海關防營分設學堂挑選弁兵一體肆習上年熱河教匪倡亂天津及山海關學堂遊派學生馳赴前敵各營練習戰事考證所學屢獲勝仗頗著成效竊維泰西各國於練兵製器之法無不精益求精日新月異中國邊海防務關係緊要近來購置新式鎗礮力圖自強若不於平時操練純熟臨事張皇無措雖有利器亦同虛設十二年四月間醇賢親王巡閱北洋親赴學堂查勘課程覆奏疏內聲稱練兵先須選將陸軍人才以武備學堂為根本各生徒於陸路鎗礮臺壘

之法童而割之長令人營帶隊必得實用將材自可日出不窮等語欽奉

懿旨洵屬扼要之論是武備學堂之得力早在

聖慈洞鑒之中前海軍衙門咨覆吏部內稱此項學生係爲豫儲異日將材最爲水陸各軍根本與各省營局請獎者不同所見極爲深遠現在規模逐漸擴充人數較前更多自應酌增獎額用資鼓舞至屢考優等各學生爲將來選將地步尤應加意培植勉其上進使知踴躍向學留備有用臣督同該堂委員嚴加刪覈現開請保各員生委係毫無冒濫相應繕具清單敬呈

御覽仰懇

天恩俯准照給獎敘以示激勸其千把以下未弁仍照章咨部註冊庶幾願學者聞風興起在事者奮勉圖功於儲材固圉之道裨

益匪淺除咨海軍衙門查照外理合恭摺具陳伏乞
皇上聖鑒訓示謹

奏

籌辦熱河電綫片

光緒十八年四月二十七日

再熱河兵燹之後伏莽猶多善後事宜須隨時妥籌布置惟地處
塞外臣與都統函牘相商非十餘日不能往返每虞延誤事機至
朝陽界連奉省去直更遠設有緩急呼應不靈必須添設電綫以
期消息靈捷飭據天津電報官局道員余昌宇委員分往勘明各
綫路繪具圖說核議稟覆前來臣查天津至熱河承德府綫路計
由津至通州二百餘里可借商局電桿挂綫其自通州出古北口
至承德府四百一十里中隔長城距河既遠料物必需陸運山多
嶺峻道險難行口外村鎮荒涼車輛亦不易雇兼以越嶺設綫山
石嵯峨鑿孔立桿甚為費力朝陽電綫應由奉天錦州官綫就近
接設計程一百八十里均係出道運料施工與熱河同一棘手迥
非內地電工可比然事關軍

國大計未便因締造艱難稍從緩辦已飭該道將需用機器電綫鉤碗各件速致外洋分別訂購其應立電桿口外亦無合用木植並派員赴遷安山內采辦分運工次加油屯布俟各料齊備刻日開工一切經費飭令設法撙節事竣由海防支應局核實報銷所有綫路經由之處應請

旨敕下

盛京將軍熱河都統順天府尹轉行旗民地方文武一體照料保護勿任阻撓損壞其運送桿綫電料由臣給發護照沿途關卡一體查驗放行將來應設分局報房常年經費及巡費等項容俟照章核定咨部立案理合附片陳明伏乞

聖鑒訓示謹

奏

請緩鹽課奏銷摺

光緒十八年四月二十七日

奏爲援照歷屆成案請緩長蘆本年正課奏銷以恤商艱仍無誤協撥京奉各餉恭摺仰祈

聖鑒事竊據長蘆鹽運使季邦楨詳稱蘆商正課例限五月奏銷自同治十年後商情艱窘節經

奏准緩至十月啟徵茲因例限將屆催令各商完納據通緝商人晉有孚等一百二十一商稟稱直隸疊被災祲銷絀本虧商累實甚歷年蒙將正課展緩藉可專顧春秋兩運仍於秋運後趕緊完課並未誤解餉期限且能增交銀數有裨餉需蓋奏銷時日稍紓商力始能周轉今催令照限完納苟能遵辦曷敢視展緩爲常例惟積年疲困已久前年夏秋順直各州縣又被水災商力更難復元本年春雨過晚水淺運艱春運過關鹽僅七萬餘包尙未悉數

抵岸鹽不能銷課從何出蘆商累多殷少全賴春運回標以顧秋運秋運回標以顧課款此時萬難兼顧懇將本屆正課奏銷援照歷屆成案展緩該運司詳加體察確係實情若令依限完納力實未逮徒事參追無裨實際請緩至十月啟徵仍可無誤京奉各餉並聲明承屬鹽課奏銷屆時隨同辦理以憑彙計分數等情具詳前來臣查長蘆正課前因商情艱窘疊次奏請展緩均經蒙

恩允准但可依限催納豈容稍任稽延惟直隸引岸向稱疲困上屆引課全完商力已形竭蹶本年春運無多全恃菜秋爲命脈刻值告運喫緊鹽尙未銷斷難籌措課款既經查明屬實應援照歷屆成案懇懇

天恩俯准將光緒十八年正課奏銷緩至十月辦理以恤商艱卽以保全課帑屆時仍當督飭運司認真催徵將本屆奉撥京奉各

餉於年內解清斷不敢稍任遲誤理合恭摺具陳伏乞
皇上聖鑒訓示謹

奏

盛宣懷調津關摺

光緒十八年五月二十四日

奏爲津海關道要缺照章揀員請

旨調補恭摺仰祈

聖鑒事竊津海關道劉汝翼丁憂開缺前經臣奏明暫行派員接署查吏部奏定章程內稱津海關道係衝繁疲難四字最要之缺地方洋務關係鉅要因時制宜未便拘執常例遷就貽誤應由臣揀員請補或於現任道員內調補或於候補道員內請補均擇其人地相宜者酌量奏請等因於同治九年十二月奏奉

旨依議欽此欽遵在案天津爲各國通商總匯近年洋務日繁必須關道得人相助爲理上下承接庶無隔閡該道兼充北洋海防翼長並須與各統將隨時商籌布置責任綦重不得不加意遴選茲查有頭品頂戴東海關監督登萊青道盛宣懷江蘇武進縣人

自同治年開奏調軍營隨臣到直歷辦海防洋務均能洞中窾要
疊經委署天津道津海關道篆措置裕如光緒十二年六月奉
旨簡放東海關道該道志切匡時堅忍任事才識敏瞻堪資大用
前委創辦輪船招商局兩次收回旗昌各輪船碼頭並增置新船
多隻歷年與洋商頡頏挽回中國權利關係通商大局該道力任
艱鉅爲人所不能爲又光緒六年以來隨臣創辦電綫條互十七
省腹地以迄東三省朝鮮新疆各處東與俄羅斯日本南與法英
丹各國水陸綫相接遇有軍國重要事件消息靈捷均賴該道心
精力果愷畫周詳該道在煙臺數年與天津一水相通所管輪船
電報兩局事機煩重雖可擇要稟商究不若就近督同籌酌更可
操縱合宜如以之調補津海關道不特洋務地方及聯絡各營精
資熟手而於

國家商輪電綫兩大要政輔益良多亦得收指臂之助東海關
本歸北洋大臣統轄既屬人地相需並與定章符合相應仰懇
天恩俯念津海關道員缺尤爲緊要准以東海關道盛宣懷調補
庶於時局有裨儼蒙

俞允所遺山東登萊青道兼東海關監督亦係海防要缺距旅順
威海大連灣各口近在咫尺非熟悉洋務軍情者不辦應請

旨迅賜簡放以專責成所有照章揀員請

旨調補關道緣由理合恭摺具陳伏乞

皇上聖鑒訓示施行謹

奏

查覆馬玉崑保案片

光緒十八年五月二十四日

再記名提督馬玉崑前在伊犁經前任將軍色楞額保送引

見經臣奏留旅順防營統領毅軍現准兵部咨開該提督履歷冊

內所保副將已由部改爲游擊其後復在何案得保參將副將又

原保名字係馬玉坤因何歧異查明更正等因臣查馬玉崑原

保副將一案係同治七年宋慶張曜兩軍剿捻濟陽大獲全勝經

臣隨摺奏保由都司奉

旨以副將儘先補用是年西捻蕩平移剿回逆駐軍陝西榆林一

帶道路梗阻並未援奉核改部文卽由副將遞保總兵此外並無

另有保參將副將之案竊惟從前勦辦粵捻巨逆每遇大捷其尤

爲出力將弁越級保升者甚多均奉

特旨俞允開有山部駁改之員或未接到部文旋又積功遞保遂

蒙

簡授專閩者亦復不少未聞於纒奉

恩命之後查改其前此所得之官馬玉崑本係百戰宿將資勞極深濟陽一役身先士卒以少擊眾厥功甚偉故蒙

特予超遷原非冒濫其後從征西陲屢當大敵疊克名城前後積功至記名提督

賞給博奇巴圖魯名號頭品頂戴黃馬褂雲騎尉世職新疆肅清案內復經前任伊犁將軍金順詳敘戰功籲請

恩施破格優獎蓋較諭勳實已無可再加是該提督卓著功勳

恩獎炳然案牘中外其間其從前所得副將一階自未便追諭核改至原保名字不符實由當日繕寫筆誤軍行急促未及校正茲

據四川提督宋慶查覆具文請奏前來理合附片陳明伏乞
聖鑒敕部查照謹

奏

海軍經費報銷摺

光緒十八年五月二十五日

奏爲北洋海軍經費光緒十五年收支各款分造清冊並開清單報銷仰祈

聖鑒事竊北洋海防用款前經總理各國事務衙門會同戶部奏明由督辦大臣咨報總理衙門戶部查核嗣於光緒九年八月部議應三部分銷歷經循照辦理已造報至三十四年止內有兵部駁查各款業經另文登覆餘均奉部准銷自十五年正月起北洋海軍經費經臣奏明遵照新章收支另作起訖以清界限應卽按年造報飭據海防支應局司道詳稱前已將新定支款照章造冊詳咨立案並聲明舊有支款無庸再行立案今自十五年開辦新章起作爲北洋海軍報銷第一案計舊管項下截存銀七萬九千七百二十一兩零新收各省關解到稅釐銀九十六萬五千一

百十兩零又各處解還領用軍火價銀九百三十八兩零准軍餉
項協撥行營製造局造子薪工及電報學堂經費銀二萬二千四
百七十二兩零北洋電報官局收繳商報信資銀九千五百六十
八兩零扣收京平平餘銀三萬一千八百十兩零北洋設立電綫
經費餘款銀三十九兩零共新收銀一百二萬九千九百三十九
兩零連舊管合銀一百一十萬九千六百六十一兩零內除扣存
平餘銀三萬一千八百十兩零係應解海軍衙門之款即在十六
年分應領鎮遠等七船俸餉內劃抵列收造報外實計收用銀一
百七萬七千八百五十五兩零開除項下應歸戶部核銷各款內水
雷魚雷等營共支銀五萬二千九百四十八兩零學堂船塢等處
員弁人等共支銀十七萬六千一百二十五兩零學堂船塢等處
雇用教習洋員共支銀四萬八百五十七兩零出洋學生及雜支

等項共支銀九千二百三十三兩零准餉協撥造子薪工等項共
支銀二萬二千一百五十四兩零應歸兵部核銷各款內海軍俸
餉共支銀二十五萬一千七百五十二兩零內河各輪艇共支銀
三萬七千八百三十四兩零各兵輪雇用教習洋員共支銀五萬
八千一十三兩零郵賞巡保等項共支銀三千五百七十四兩零
應歸工部核銷各款內采買共支銀十四萬五千八十九兩零工
程共支銀四萬九千五百九十七兩修理共支銀四萬九千三百
二十八兩零製造共支銀十萬六百七十三兩零以上統共支銀
九十九萬七千一百八十三兩零其餘銀八萬六百六十七兩零
已接支十六年以後用項無存循案造具三部分銷細冊收支四
柱總冊開具款目清單詳請奏咨核銷前來臣查十五年分北洋
海軍經費係由海軍衙門按常年額支之款核定指撥以供計授

要需遇有必須添購要件添建要工不在歲撥數內者前已奏明
由工需雜費項下截長補短竭力勻籌此後海軍應辦各事需費
正繁如有額外用款實難騰挪再行查照奏定海軍章程隨時咨
商海軍衙門妥籌核辦值此時艱餉細非特新增用項必加詳審
卽舊有支款無不督同在事各員隨時考察可省卽省至訂購外
洋軍械器具其價目多寡尤必諮訪比核務求撙節不使稍涉虛
糜惟海防參用西法一切支款並無例案可循亦非他項軍需可
比業於立案摺內將應辦各項實在情形詳細聲敘茲再逐款覆
核委係實用實銷並無絲毫浮冒除各冊分送戶兵工三部並咨
總理各國事務海軍衙門查核外理合開具簡明清單恭摺具陳
伏乞

皇上聖鑒敕部查核在銷謹

奏

賑撫收支彙報摺

光緒十八年六月十三日

奏爲查明光緒十六年六月至十八年五月籌辦賑撫收支銀錢米衣照案開單彙報恭摺仰祈

聖鑒事竊前因直屬歷年災歉辦理賑撫業將收支各款數目截至光緒十六年五月止於是年十二月開開單彙報請免造冊欽奉

硃批著照所請戶部知道單併發欽此轉行遵照在案伏查十六年六月順直猝遭水患各河漫溢被災地方除順屬外直屬州縣至四十餘處之多工賑兼籌需款極鉅經臣奏蒙

恩准截留漕米提撥濟運庫款並於本省外省開辦推廣賑捐分投勸募以資接濟兩年以來所有辦理賑撫情形及疏築隄河工程均隨時陳奏在案應將收支銀錢米衣數目自光緒十六年六

月起至十八年五月止照案核實開報飭據籌賑局司道詳稱上屆原存連此次新收各款內有撥歸順天賑撫應由府尹臣開報及業經專案奏銷之款均行登除外實計收用銀二百五十三萬四千五百二十三兩三錢三分八釐二毫八絲三忽六微津錢七十七萬七百十七串五十二文漕米十二萬一千五百二十石一斗四升五合大米七千七百四十石七斗七升五合粟米二萬四千九百六十三石四斗一升九合九勺三抄二撮五圭高粱三萬四千十四石七斗六升棉衣六十萬一千四百三十二件除支發外計尙存銀四十四萬一千二百三十七兩九錢九分七釐六毫三絲一忽二微津錢八千四百九十七串二百五十五文大米一千八百四十八石二斗七升棉衣八萬一千一百五十四件應歸十八年五月後工撫用款再行開報請核奏前來臣查十六年夏間

直隸水患之重災區之廣爲自來所未有數百萬垂盡災黎嗷嗷待哺司局各庫支絀萬狀幾致束手無策幸賴

皇仁浩蕩截漕發帑遐邇同欽各疆慷慨恤鄰設法籌捐陸續解濟俾工賑兩項得以放手搶辦剋期成事實爲始願所不及惟念直隸地勢西北高阜東南低窪晴雨愆期旱澇立致加以大清永定子牙南運北運五大河環匯境內每遇盛漲宣洩不及動輒潰決辦工辦賑幾於無歲蔑有直省爲缺額之區庫儲久絀大禮之後閭閻元氣未復懲前愆後尤當爲綢繆未雨之謀現存捐款已飭該司道力求撙節嗣後應辦工撫察酌情形核實動用不在稍涉糜費免致臨時棘手於大局裨益匪淺至此次辦理賑撫仍係恪守定章凡有不急可省之費無不力加裁汰其應賑戶口先由州縣查明災歉村莊分數府廳督勘相符再派廉幹員紳確查

散放從不假手胥役災輕則口多糧少災重則口少糧多其被水
圍繞之處派員泛舟前往紮筏濟渡無稍遺漏委員薪水川資仍
由司局籌給力杜擾累當被災之初饑民流離載道天津保定等
處均先擇地搭蓋席棚招集棲止分設粥廠米廠計口授食夏施
藥餌冬放棉衣以免失所迨水勢消退地畝涸復無力歸耕者又
復按名酌給籽種口糧遣回原籍俾安生業至各處河工或堵築
決口或加培隄身或疏濬積淤或修建橋壩均揀派道府員紳與
賑局司道核實籌辦招集災民就地傭趁以工代賑並調派淮練
各軍幫同挑辦酌予犒賞間有向歸民辦之工甫被災視民力未
逮亦分別津貼以示體恤所用各款實皆涓滴歸公臣督同司道
認真察核詳細旬稽工料價值較部定章程節省已多委係實用
實銷並無絲毫浮冒查直隸每屆賑務報銷均係開具清單請免

造冊歷蒙

恩准上年十月間順屬賑務報銷經府尹臣開單具奏請免造冊

亦奉

俞允在案此次直屬報銷自應照案辦理謹將收支各數彙開清

單恭呈

御覽仰懇

天恩俯照歷屆奏准成案免造細冊以昭核實而省繁費理合恭

摺具陳伏乞

皇上聖鑒訓示謹

奏

覆陳熱河剿賊加餉片

光緒十八年六月十三日

再上年淮練各營調赴熱河口外剿賊據直隸提督葉志超來咨以各兵勇所支口糧不敷食用請每名酌給犒賞銀二三兩以示體恤當經飭據淮軍報銷局練餉局司道議復擬從極省辦法將出征兵勇每名加給半月餉銀作為犒賞之需經臣批准核實籌放並飭開具兵數餉數清摺咨部在案茲准戶部以此項銀兩為軍需例章所無又未奏明奉

旨礙難核准等因咨照前來臣查熱河教匪之亂事起倉猝時值

隆冬若撲滅少遲不但蔓延可憂糜餉亦必更鉅幸賴

國家威福將士用命各營兵勇於冰天雪地之中晝夜窮追奮勇殺賊閱時僅逾一月股匪悉數蕩平勞苦情形實堪嘉憫近年口外早荒糧米艱貴又值賊匪擾亂之際一切食用物價尤昂較內

地州兵情形不同各兵勇口糧甚微未免窘累酌加犒賞給與牛
月餉銀爲數有限今戶部以無例章可循未便核准自爲慎重
項起見惟念各營將弁於賊平之後均已仰邀獎敘其沐
皇仁若令兵勇向隅何以勵將來而作士氣所有加給去冬調赴
熱河勦匪兵勇半月餉銀合無仰懇

大恩俯准賞給仍部查照以示鼓勵謹附片具陳伏乞

聖鑒訓示謹

奏

劉瑞芬請付史館摺

光緒十八年六月十三日

奏爲已故_臣劉瑞芬勤勞卓著事跡可傳據實臚陳懇

恩宣付史館恭摺仰祈

聖鑒事竊原任廣東撫_臣劉瑞芬因病出缺業經兩廣督_臣李瀚

章將_臣懋官本末奏蒙

特旨矜恤有加凡在_臣工同深欽感惟念該故撫_臣從事淮軍與

戰事相終始逮由監司洊陟封圻其開綜權滙關懋使俄英法諸

大國並交涉繁曠之區前後事跡_臣知之最詳有不敢壘於

上聞者查劉瑞芬以諸生受知故大學士曾國藩招致行營同治

元年_臣督師東下檄令總理水陸軍械其時初用西式鎗礮皆購

自外洋稍未詳求輒以重價得苦窳之器劉瑞芬考驗獨爲精審

前敵百數十營攻戰所需應時解濟並皆精利所向無前淮軍以

能用西洋利器著名其後將吏皆知講求而劉瑞芬實開其先為
一時所推服同治四年在江督署任內期賊喫緊需餉浩繁委
令督辦松滙釐捐為江海百貨所藪萃行商多冒洋票以冀偷漏
吏胥復緣以為奸劉瑞芬綜核嚴密盡除宿弊收數日增淮軍及
各省餉源深資接濟先後積功洊保道員光緒二年署兩淮鹽運
使適淮北大饑流民十餘萬相率南徙皆聚揚州乞賑劉瑞芬預
籌款項詳定章程於城外築土圍十餘區按籍分戶計口授食給
隨藥以治疾疫嚴巡緝以防掠竄吞融按名資遣無斃於凍餒者
三年署江海關道旋蒙

恩簡放是缺滬關為長江各口首衝洋務之繁甲於東南劉瑞芬
在任五年遇事執理持平為洋人所懾服其最著稱者在浦江創
設水利局稽察商船停泊以杜洋人侵佔南界禁止洋商在吳淞

口卸貨以防洋貨潛銷內地力持土藥加稅嚴禁自來水火入城
皆審度事勢或折之於初發或爭之於將成人皆以爲難而臨機
籌應悉中竅要十二年在江西布政使任內奉

旨充出使英俄國大臣十三年改英法義比國大臣在外洋四年
與非洋關涉事件書牘往還籌畫周密如接帶快船訂購雷艇添
配礮械履募洋匠位置學生並得該大臣之力蓋劉瑞芬於外洋
新式器械究心已久所購皆適用而價不加增洋員之有材藝者
其海部多祕惜不以應募或故斲之以索高資而自近年英人增
設兵船添練學生限制外來附學者每國不得過三人時中國學
生十六人業已出洋力拒不受劉瑞芬多方曲喻卒得洋將之上
選者應募並允將各學生分派海口練習中國海軍得效練之益
而無挾制之患出洋學生得肄業之所而無往返之煩其尤爲中

外大局所關者力爭於英外部追還印度入藏之師創議開辦黑龍江漠河礦務隱絕俄人窺伺之謀並有益於邊防甚大初至俄國正值嚴寒遂得肺疾抵法國後感患時疫致病幾殆調理雖愈而元氣大虧及至廣東復受炎病觸發舊疾遽至不起伏查故戶部侍郎曾紀澤以出使勤勞故河南巡撫倪文蔚以在官治績經臣及東河督臣許振祿先後奏准

宣付史館故福建按察使徐文達以軍營積勞經臣奏准附祀淮軍昭忠祠仰見

聖朝軫念勞臣有加無已劉瑞芬奉使之勤同於曾紀澤居官之績同於倪文蔚軍營之勞與徐文達相等而名位過之合無籲懇天恩俯准將該故撫臣劉瑞芬事跡

宣付國史館立傳並附祀淮軍昭忠祠以彰盛績出自逾格

慈施理合恭摺具陳伏乞
皇上聖鑒訓示謹

奏

辦理朝鮮商務請獎摺

光緒十八年閏六月初八日

奏為派赴朝鮮辦理商務交涉原調續調各員又屆三年期滿照案彙核請獎繕單恭摺仰祈

聖鑒事竊臣前奏派赴朝鮮辦理商務交涉各員照出使外洋之例三年期滿由臣酌核請獎經總理衙門議奏奉

旨允行在案嗣屆三年期滿業將出力各員奏准獎敘其武職各員陳明請照文員一律給獎奉

硃批著照所請該部知道欽此現在原調續調各員扣算月日又滿三年由總辦交涉通商事宜道員袁世凱具詳請奏前來臣維朝鮮孤懸海隅強鄰環伺時陰唱以自主之利屢欲沒其藩屬之名自派員駐紮以來顯與維持隱為防範雖經煽擾不為動搖中朝統轄之權始專各國猜忌之心亦愈甚每遇交涉之件輒連

術設計圖逞其私日本與朝鮮通商最先壟斷最久近見中國在
彼逐漸經營商務益慮分其利權遇事輒生訟端案牘紛積朝鮮
政令本極廢弛游匪徧地自關市開通之後奉天山東各處流氓
散勇時復潛往勾通滋事必須會同兵船隨時查拏彈壓以全
國體而靖藩疆詳察近日情形於辦理交涉通商各務成效漸彰
而時勢之變因應之難尤非昔比該委員等遠役海外當羣疑震
撼之交處事機繁曠之會實能盡心經理操縱合宜始終不懈較
之出使東西洋各國循例辦公者更爲艱苦洵屬異常出力有裨
大局其駐防兵船武職各員晝夜巡緝亦能不辭勞瘁卓著勩能
現又屆三年期滿自應援案一體奏請獎敘茲將文武各員繕具
清單敬呈
御覽謹懇

天恩俯准照案給獎以昭激勸除千把以下未弁照章咨明兵部核獎並飭取各員履歷分咨查照外理合恭摺具

奏伏乞

皇上聖鑒訓示謹

奏

奏保袁世凱片

光緒十八年閏六月初八日

再二品銜分省補用道袁世凱經臣於光緒十一年九月奏派前赴朝鮮辦理通商交涉事宜時承朝鮮再亂之後羣情疑懼俄日並謀侵佔該國王又惑於自主之說特小乘開構煽與駐韓洋人連衡倡和變詐疊起不可端倪袁世凱先正藩屬之名以防其僭越復籌外交之法以杜其侵欺凡體制所繫利害所關或先事豫籌或當機立應或事後補救無不洞中窾要自八年十年兩次遣兵定亂袁世凱均在行閒熟悉彼中情勢韓臣之老成持正者皆敬服之遇有疑難輒輸情以告羣小愈不使其所爲屢設機謀巧圖傾陷袁世凱屹不爲動調停與黨聯絡各使設法防護卒令無隙可乘苦心毅力尤爲卓絕朝鮮以蕞爾弱國外偏強鄰尙能自保利權不失臣節自袁世凱駐韓以後其國中之事纖悉皆聞臣

乃得與總理衙門遇事籌商上乘

廟謨控制藩服其有關於東方全局者甚大歷年以來籌辦各事
經臣隨時咨達總理衙門案牘層疊可覆驗也該道於十七年九
月已屆二次差滿例應敘保但虛銜實職無可再加迹其從事海
外不避艱險獨爲其難實非尋常勞績可比臣於十一年十六年
以該道膽略兼優血性忠誠先後奏保近日察其器識尤能深沈
細密歷練和平洵屬體用兼備置之交涉繁劇之區必能勝任合
無籲懇

特恩以海關道存記擢用出自逾格

乞 慈施臣爲儲備人才激勵任事起見是否有當理合附片陳請伏

聖鑒訓示謹

奏

請推廣賑捐摺

光緒十八年閏六月二十二日

奏爲順直災區甚廣工賑需款浩繁仍請開辦推廣賑捐以資接濟恭摺仰祈

聖鑒事竊查順直各屬本年因伏雨過多河水漫溢窪區被淹民情困苦業將被災情形馳奏在案昨蒙

特恩截留江蘇江北河運漕糧十萬石分撥賑撫仰見

皇仁浩蕩溥海同欽茲據順直所屬稟報被災州縣共有三十餘處之多收成大半失望積水驟難涸復補種晚禾已屬無及小民蕩析流離嗷嗷待哺深堪憫惻現先於天津地方開設粥廠收養飢民一面派員分赴被災處所查辦急撫惟約計冬賑春賑爲日甚長兼以永定大清南北兩運瀕龍湖白等河漫口林立近日天雖晴霽水勢仍未消落必須迅籌堵合方免久淹爲患工撫兩項

非有鉅款源源接濟斷難措手臣與司道多方計議查光緒十六年順直水災開辦推廣賑捐銜封貢監等項以四成實銀上兌新海防例均暫停收並仿照江浙賑捐章程准捐翎枝二品頂戴又按照火器營章程准由貢監加捐鹽運使副將參將等銜又各省被議人員分別官階銀數准請

賞還銜翎又報捐棉衣除照例建坊外如折解實銀亦准一律核獎均經部議准行俾應辦工賑得以及時蒞事全活災黎無算實屬著有成效現在災重費繁款無所出惟有按照前案開辦賑捐或可稍資濟助據籌賑局司道詳請核奏前來臣查本年順直水勢之大災區之廣與十六年情形略同直省爲缺額之區司局各庫支絀異常值此時艱又未便請撥部帑

緩卹重地民生疾苦上塵

宸衷但有補救之方不得不悉力籌維爲民請命用敢披瀝上陳
籲懇

聖恩仍准開辦賑捐其一切章程暨推廣各條悉照光緒十六年
戶部議准成案辦理由直刊刻正副實收益用天津道印填給捐
生並分咨各省廣爲勸辦按次造冊咨部頒照其部監飯照等費
查照向章隨收解部各省善捐義賑均准一體核獎如有報捐鉅
款至萬兩以上仍照部定章程專案奏請優獎藉廣招徠自開辦
之日起予限一年限滿卽行停止所收捐款隨時會商順天府尹
分別災區輕重酌量勻撥惟念近年捐務已成弩末各省再三勸
募幾同竭澤而漁此次開辦賑捐係於無可設法之中冀收寸效
儻捐數未能踴躍災區不敷分布當由司局各庫竭力籌撥以濟
急需而全民命所有順直等屬被災甚重籌款維艱仍請開辦賑

捐緣由謹恭摺具

奏伏乞

皇上聖鑒訓示遵行謹

奏

酌定旅順船塢新設片

光緒十八年閏六月二十二日

再旅順口內建造大石船塢並船澳廠庫各工於光緒十六年秋
開全工告竣當經驗收奏明在案復由臣遴派直隸候補道龔照
與前赴旅順會同原辦道員劉含芳設局開辦查全塢所管機器
吸水銅鐵鍋鑪木工舢板各廠多至十餘座兼管存儲物料煤炭
各庫暨電燈泊岸艇棚各項事宜工作極繁在在需人勢難減省
現就開辦情形按事分派以職司之繁簡定人數之多寡以工藝
之優劣定餼糈之高下分別等第撙節酌定統計員司弁目匠徒
夫役人等每月額支薪糧公費等項約需銀七千五百十四兩有
奇每年約共支銀九萬餘兩自光緒十六年八月初一日起支在
於北洋海軍經費項下按月撥給彙案造報其每年采購物料應
視工程多寡購備存儲實用實銷未能預定數目據辦理海防支

應局司道等詳請具奏前來竊維北洋創辦海軍歷年添購鐵甲鋼快等船規模略具從前並無修船巨鵬遇有修理要工必須駛赴日本香港各洋廠諸多不便自旅順造辦石船鵬各戰艦均可就近修理無須借資外國緩急可恃洵爲海軍根本至計查海軍衙門奏准章程內載旅順船鵬每年工料經費銀二十萬兩如遇工程較多原定經費實有不敷准核實估定另行添撥等語此項月支薪費係就現在海軍各艦常年應用各工撙節核定無可再減至鎮遠定遠等船行駛有年船身機器應修之處甚多不特將來大修必須另行請款卽每年歲修遇有情形較重之處亦須添雇匠役趕緊修理以後續增艦艇添建廠庫工作日廣用人較多薪費一項尙應照章酌加免誤要工應俟隨時據實核辦仍飭將實用工料各款月行彙案造銷所有酌定旅順船鵬員司匠役人

等月支薪費數目除將清單咨海軍衙門戶工部查核外理合
附片陳明伏乞

聖鑒敕下各該衙門知照謹
奏

請給俄員寶星片

光緒十八年閏六月二十日

再各國洋員與中國辦事出力歷蒙

賞給寶星在案茲有俄國總兵左克羅斯奇前因辦理中俄分界

事務曾經

賞給三等第一寶星該洋員感激

恩施數年以來於理春邊界交涉事宜均能秉公竭誠盡心襄助

頗著勞績查該總兵職分較大擬請

賞給二等第三寶星以示鼓勵俟奉

旨後由臣照式製造二等第三寶星一面仍請總理各國事務衙

門填給執照以憑轉發除咨總理衙門外謹附片陳請伏乞

聖鑒訓示謹

奏

李文忠公奏稿卷七十四